



臣朱壽朋敬編

臣汪錫增恭校

十一月戊申朔大祀 堂子欽奉 慈禧端佑康頤昭豫莊誠皇太后懿旨賜醇親王肉一盤大學士閣

敬銘饌一盤○劉錦棠奏臣光緒十三年二月十六日承准軍機大臣字寄光緒十二年正月十七日奉

上諭富勒銘額奏烏魯木齊滿營官兵議遷古城請援案撥還隨缺地畝一摺等因欽此遵有寄信

前來等因到臣當經欽遵飭查吉布庫地畝現已歸綠營耕種其頭二三等屯向爲綠營屯地自遭變亂

地畝盡荒光緒三年經前陝甘總督臣左宗棠招集流亡給資承墾迄今陸續增添已安插百數十戶共

男婦一千數百口耕稼婚娶漸成土著若以此項地畝撥歸滿營不但遷移改撥徒滋勞費且甫經招集

忽議遷徙亦甚非 朝廷勞來還定之意臣查古城東灣中渠地屬上中接引山水澆灌得地一萬餘畝

如歸各滿營耕種不敷由附近之大板河西岔撥給查大板河約地三四千畝西岔約地四五千畝該各

處曾有戶民墾種爲數甚少遷移較易毋庸將頭二三屯地撥歸滿營如此辦理似民兵兩便並經行司

飭縣估計修渠經費檄行城守尉德勝委勘覆辦去後茲據德勝呈稱查巴里坤滿營現未遷齊烏魯木

齊滿營曾經遷併安插尙未就緒所撥東灣中渠等處地畝修理各渠又非急切所能竣事擬請展緩三年再行屯墾藉紓兵力等情前來臣覆加查核自係實情惟事關旗屯未敢擅便理合恭摺具陳下戶部知之○諭托倫布奏車臺廢員由配脫逃請旨飭緝究辦一摺已革游擊田福志膽敢由配脫逃該都統已咨行鄰境緝拿難保不私回原籍或潛行來京著廣西巡撫步軍統領衙門順天府五城御史一體嚴拿務獲究辦○沿霽奏查前年奏請就黔省鎮遠府青谿縣開礦鍊鐵委員往上海採購機器招募匠工茲准候補道潘彬將鐵廠機器匠工製募齊備現已陸續赴青因飭該道卽由明春開鑪不得遲誤所有機器匠工到青緣由先行奏聞得旨如所請行○己酉命奎潤爲正使福錕爲副使行納采禮○剛毅奏陽曲等二十一廳州縣被旱被水被雹被鰲成災並綏遠渾津黑河二村被雹歉收查勘撫卹下戶部知之○諭汪鳴鑾奏敬舉績學耆儒籲懇恩施一摺廣東在籍紳士知府銜陝西補用直隸州知州張其翊國子監監丞銜舉人金錫齡增貢劉昌齡砥行通經品端學贍均堪矜式士林張其翊著加恩賞給四品銜金錫齡著賞給光祿寺署正銜劉昌齡著賞給翰林院待詔銜另片奏薦舉篤實廉勤之教職等語韶州府教授潘履端潮州府教授貢寅階石城縣訓導嚴其琛均著賞給國子監助教銜以示獎勵該部知道○庚戌頒給熱河灤平縣鞍匠屯街龍神廟匾額○辛亥以林成興爲山西太原鎮總兵○諭剛

毅奏請飭催總兵赴任等語山西大同鎮總兵張樹屏前經賞假回籍就醫早經假滿著安徽巡撫傳知該總兵迅速赴任以重職守○諭剛毅奏特參專閫大員貪劣多端難資統率一摺山西太原鎮總兵何鳴高辦事任性任用私人兼有扣餉曠糧情事實屬貪利營私難膺閫寄何鳴高著卽行革職○癸丑何福堃奏六部爲儲才之地名臣循吏半出其中今登進之途較寬而傑出之才較少卽如司員中目爲能辦事者亦復屈指可數此非人才闕乏乃用之未盡其長也曩時員缺旣通人得及時自効故歷練久而成多比年部曹皆苦淹滯但舉候補者言之自吏部而外員數之浮於額缺不啻落第循資平進正途或十餘年不得敘補捐班或二十餘年不得序補方其年富力強志盛氣銳不獲稍展尺寸之長迫遲之又久而敘補題升而保送擢用其人非精力衰頹卽英華消沮此豈朝廷培養人材之初意往者言臣屢有疏通之請部臣重於更張阻格者十常八九用是壅擠滋甚澄敘靡由夫論目前壅擠原不獨司員一項然司員者部中所資以辦事道府多就此取材未可與吏秩間曹一概而論旣有壅滯情形似當酌擬變通之法臣管窺所及謹爲 皇太后 皇上陳之一擬將俸滿郎中咨取分發查俸滿郎中例有京升一途無論正途插選均極遲滯若其人別無出路專候銓選計自記名日起非十餘年不得到班近年一部中或積至五六人或三四人壅擠之源大半由此此項人員例本准其呈請分發特因外補尙虛而

選班已斷故多裹足不前然其郎署浮沉於部務初無裨補可否每年於每部中將記名最先者由吏部咨取分發一員按十八省輪流簽掣比照庶吉士散館分部行走之例仍歸原班銓選如督撫將該員請補或奏留者始將選班開除如此分發各直省如三年中添一員仕途不致壅積各部於一年中去一員人缺便可周轉其有京察現保一等暨各司正印正稿及雙單月頂選或已得御史者不在咨取之數其自行呈請分發者仍照舊章辦理一擬將分發直隸州知州借補他缺查吏部新章內開各部實缺主事保送直隸州知州毋庸俟吏部咨取記名後准其隨時呈請分發原爲疏通部員起見惟直隸州員缺太少外補綦難故分發者無幾嗣後漢主事呈請分發到省除直隸州缺出先儘請補外其同知額缺較多品級相等遇有題調各缺可否准其借補與他項記名分發人員比較到省先後如人缺不甚相宜應令督撫揀員調補不得遽爾過班一擬揀員分發河工俾資歷練查吏部則例舊有京員揀派河工學習一條嗣因河防安謐揀發久停此例幾成虛設近年鉅工疊出宵旰憂勞正大小臣工所當實心講求之時謹擬參用舊例仍兩年揀派一次專就各部實缺漢司員中咨取不計何項出身該堂官擇年力強健材堪造就者咨送一人吏部俟各部送齊後彙繕名單進呈御覽請旨發往學習開其本缺以到工日起兩年期滿如果諳練河務由河督出具考語送部引見郎中員外郎以知府用主事以同知用發

回河工遇缺卽補若兩年未能諳習仍咨回本部遇應補之缺卽補此條因河工需才部員人滿設法酌劑如吏部准行遇缺派河工時該部不得以無員可送咨覆塞責一擬將呈改外用之例分別推廣查進士榜下分部未經奏留者例准呈請外用其學習已滿三年經堂官奏留及庶吉士散館分部行走者向無呈改之例本所以優之也乃若敘補無期久滯郎署是優之者適以困之似不若授以一邑一官俾得及時自効嗣後此兩項人員有未經補缺自願呈改者擬請以知縣註選由留部主事呈改選班在本科進士之後由散館主事呈改選班在本科散館卽用之後以上四條請 飭吏部詳議覆奏 上諭御史

何福堃奏漢司員班次壅滯酌擬條欵設法疏通一摺著吏部議奏○甲寅移八旗漢軍礮營練兵演礮處於蘆溝橋永定河西岸沙灘○岑毓英譚鈞培奏查臨安府屬納樓茶甸長官司副長官普率自於順治十六年間投誠授職後世襲土官至咸豐十一年間該土官普永年故後其子普衛邦未及歲未經承襲旋亦病故光緒四年土族普保極等以爭襲土職互相殘殺當派官軍前往相機剿撫旋據普保極等悔悟投誠各土目亦經就撫經前督臣劉長佑與臣毓英將剿撫情形先後奏明有案嗣因普保極普堯年普應芳於投誠後復鼠雀兩端經臨安府劉毓珂將其計誘入城管押惟普應昌一犯尙在逃未獲經臣毓英與前巡撫臣杜瑞聯前雲南藩司唐炯悉心查核酌議以納樓土官嫡派絕嗣若以別支襲職難

得駕馭之人且恐土族希冀藉口仍啟爭奪之禍擬請將土司所管八里三猛地方改爲土舍卽擇該土官親支普衛本等四人分管其地以息爭端並請將光緒七年年底以前積欠錢糧及光緒八九十三年錢糧分別豁免徵俾負生活至普保極等三犯擬發建水縣監禁十年俟限滿查看納樓地方如能從此安靜再予省釋若再有結黨仇殺情事卽將該犯等正法其普應昌一犯兇狡異常擬請飭拿務獲正法以遏亂萌當卽恭摺會奏於光緒九年四月初七日軍機大臣奉 旨納樓地方應徵錢糧著照所請分別豁免免徵所請將土官改爲土舍擇人分管之處著該部議奏欽此嗣經兵部等會同議准具奏欽奉 諭旨依議咨行欽遵在案茲據臨安府全祿續稟稱納樓土族普應昌前因爭襲土職樹黨仇殺逃亡在外屢次嚴拿未獲今復回籍欲圖併吞滋事經該府訪聞密移臨元鎮左營都司劉全忠於本年八月初十日將普應昌用計拿獲就地正法等情稟報前來 臣等查普應昌負罪在逃本應拿獲正法之犯尙敢復圖滋事實在怙惡不悛既經該府等將該犯拿獲懲辦應毋庸議普保極等在監並不知普應昌逃回情事應請仍俟監禁十年限滿再行察看情形分別辦理應飭該府嚴飭土舍普衛本等潔己奉公妥爲彈壓毋得詐擾生事自取咎戾下部知之○乙卯山西大同鎮總兵張樹屏病請解任允之○頒給直隸寶坻縣 關帝廟 龍王廟 城隍廟匾額○劉秉璋奏簡州知州王錫鏞非刑致斃人命得 旨

王錫鏞著先行革職歸案審辦○丙辰以黃金志爲山西大同鎮總兵○頒給浙江天台縣 關帝廟於
潛縣 韋馱神匾額○頒給河南魯山縣 城隍廟匾額○丁巳洪鈞奏請選派庶百士出洋昇以二三
等參贊三年期滿由使臣保奏授職編檢總署已經考取之正途章京擇派參隨俾先期閱歷參隨員數
明定限制游歷經費併入度支下所司議奏○戊午以扎拉豐阿爲正藍旗蒙古都統○理藩院尙書紹
祺卒派載澤前往奠醊卹廕如例並賞銀一千五百兩治喪○以嵩申爲理藩院尙書○張曜奏臨朐濰
縣惠民齊東青城蒲臺等縣前因雨水山水同時長發當將被淹地方飭查撫恤情形附片奏報在案嗣
據濱州高苑博興樂安東平等州縣稟報被水情形輕重不一亦經委員往勘籌辦賑撫現值隆冬貧民
饑寒交迫被災較重之處尙須再加撫恤以免流離惟賑撫局存欸無多必須另籌散放東省司庫實係
無欸可籌事關民瘼又不容稍事延緩臣與司道公同商酌查本年奉撥京餉銀四十萬兩現已陸續起
解不敢絲毫短欠續奉部撥銀五萬兩可否仰懇 天恩俯准留於山東作爲賑欸之用出自 鴻慈得
旨如所請行○升泰奏奴才前於八月初五十八九月初十等日先後將藏番情形馳奏在案邇來自
八月二十日戰敗之後該番初次聞信頗有著急之心及聞蕭占先阻回印兵仍紮原處其狡玩之態依
舊復萌連日以來揀派三大寺喇嘛僧衆前往帕隘防堵委員等百計開導第穆呼圖克圖竟無法阻止

又接邊報謂前月戰事被鎗礮死者約五六百人被驅逐落水者亦數百人藏番各路土兵共一萬四千有零茲聞收集敗殘僅五六千人其餘概行逃散番官派人往追卽有變亂之勢奴才復接洋官來信謂天寒不能再候而該番等仍然四路調兵又以噶布倫中一二人意在主和有壞黃教羣議欲拋之藏江又迭懇奴才務必爲之向印洋索取哲布全土種種要挾出乎情理之外奴才前據闡藏僧俗各出圖記具稟停戰統兵公爵噶布倫亦據有遵諭之結不料變生意外兩營彼此尋釁藏番一敗塗地猶幸印兵阻回否則帕隘江孜均屬不保該番等宜如何猛省悔罪以不負朝廷覆庇深恩乃有權黨十餘人阻撓其間藉三大寺人衆爲名以抗官藉吹忠降神爲名以抗旨意在使駐藏大臣竭力婉說以遂其索取哲布全土之謀並敢言此番戰敗係因遵旨所誤昧良喪心莫此爲甚況兩藏番兵心膽已寒人無鬪志一聞權黨仍議用兵無不背地詈罵私議逃亡假使另行派兵仍可期其必敗奴才因自行到邊是以飭令後藏糧務秀蔭回臺料理俄官尼遊歷等事藏番因其續調之兵未到竟將秀蔭留於前敵以備堵禦洋人居心險惡乃至如是奴才必得將藏番撤兵議妥始可與洋官商辦今藏番貪念若此雖不欲冒昧遽進又覺邊事之不可再延實慮洋人以天寒不能久待再行進兵而敗殘之兵迫於饑寒更恐其內亂將作茲於九月二十八日後接秀蔭蕭占先迭次飛稟云洋人又提營進紮姑布又據哲孟雄頭目

稟報洋人已過發鉛彈又添兵修路意欲分兵四路撲藏軍情萬分喫緊再四思維如必待藏番將前稟要挾之求概行改悔然後啟行竊恐洋人以久待不至翻悔前議則貽誤非淺欲速出藏而藏番因此一敗四路徵調百姓聞風逃避夫馬僱覓不易行糧亦採辦未來徒使人日夜焦急刻已先派妥弁致信英官告以藏使必來會辦並勸其顧念和約務須克踐前言萬不可以妄動奴才一面催促速行到界妥辦第藏番能否消盡妄念實未可知邊情如此不敢不先行馳奏如數日內能卽就道再當奏報啟程日期尙冀 聖明洞鑒指示機宜 奴才曷勝迫切待 命之至 上諭軍機大臣等升泰奏邊事緊急據實縷

陳並密陳印藏情形各摺片覽奏均悉藏番執迷不悟昏愚狡玩日甚一日該大臣所陳辦理棘手情形朝廷早經洞照至因川藏邊防籌及西甯青海亦具有深意但此時欲解藏厄舍該大臣卽日赴邊罷兵定界更無別法至開導一事雖萬難措手亦必須竭盡心力做去以冀挽此敗局該大臣先派妥弁函止印兵勿動一面自備夫馬速行到界所辦均合機宜卽著懷遵十月廿三日 諭旨妥籌辦理毋再延緩

致誤事機所請飭總理衙門預告英使各節該衙門已屢與華爾身切實言及但藏兵不撤印兵必進亦斷非空言所能阻止此事關係重大 朝廷正切紆籌該大臣到界後務將辦理情形迅速馳奏將此由六百里密諭知之○己未李鴻章奏光緒十二年十月准總理各國事務衙門咨開據法國駐京公使照

會以廣西邊界中國電綫距越南東京法國電綫甚近若彼此接連受益不淺咨查有無窒礙等因飭據總辦電報事宜東海關道盛宣懷稟稱法國陸路電綫自鎮南關邊外起以達越南東京至西貢並通越南各內地又由西貢接連英綫至暹羅之都城彭高地方且繞出緬甸至印度等處中國陸綫如與接連則價目較海綫便宜以上各處電報皆可由此轉遞獲利誠於中國有益中國電綫既與英丹海綫接連法綫事同一律祇須章程嚴密中國界內不准該國陸綫侵越尺寸地步亦不准該國設立電局無事時不妨接綫以收利益有事仍可斷綫以示隔絕自無窒礙等情業經咨商總理衙門核准照覆法國公使允其接連在案臣卽分咨粵省督撫臣查照一面飭盛宣懷會商粵電局妥辦旋據盛宣懷稟稱奉兩廣督臣張之洞批示亦以祇須中國界內不准該國陸綫侵越爲關鍵今年七月法國駐津領事林椿奉其本國之命前至煙臺會同該道擬就廣西之鎮南關電綫與越南北圻之同登地方法綫相接事宜十一條並另加專條大致以設局造綫彼此各至分界處所爲止不准侵越邊界尺寸地步其餘係傳報章程及報費數目惟第二條內該國擬請廣東邊界之東興電綫與北圻之芒街卽蒙開法綫相接又雲南邊界之蒙自電綫與北圻之保勝卽老開法綫相接雖均爲初議所未及但東興蒙自兩處邊綫並無商報其費皆出公家若准連接亦可藉收商報於養綫經費不無裨助且與鎮南關情事相同經臣照錄所擬

章程咨准總理衙門覆稱添接東興蒙自兩綫核與接綫原議事屬一律詳閱各條尙無窒礙難行應如所議辦理並擬入萬國電報公會及第十條法郎兌價隨時增減之說稍欠分曉應更正等因復飭據盛宣懷稟稱萬國電報公會願入卽入與此約無干不必添列至第十條法郎增減遵已更正並將前次繙譯字義稍有未符之處妥細核對準確連專條統訂爲十二條林椿以時屆封河卽須回津請卽在煙臺畫押並請奏明遵行該道遂電請臣與總理衙門覆准卽於十月二十八日將所訂章程與林椿畫押蓋印訂明鎮南關一綫俟中國奏明奉准卽行接連東興蒙自兩綫俟奉准後十八箇月內再接計繕漢文法文章程各四分法國應執兩分中國電報總局存留一分其餘一分稟送前來臣查外洋各國電綫彼此相接以通平日商報而資養綫經費各國均無禁止接綫之例卽如法德鄰邦世仇日相窺伺電報仍往來如織蓋有事明斷其綫暗阻通信我可自主並無窒礙中國電綫久與英丹兩綫相接藉通中外消息甚於大局有裨今與法綫接連藉收商報之利有事時斷綫阻信仍可操縱由我理合照錄章程恭摺具陳得 旨允行○李鴻章奏海軍衙門擬定北洋海軍章程前已繕冊具奏奉 懿旨依議欽此當經轉行欽遵分別開辦茲查章程內俸餉等項現在釐定之數與向發數目多寡均有不同本年冬季薪餉因各輪艇紛紛具領已照向章陸續發給年內不便改發應請自光緒十五年正月初一日起將海軍俸

餉等項照新定章程辦理海軍提鎮等官有補缺在先者其俸餉亦自來年正月起照新章開支以歸一律所有向發薪餉等項既與現定俸餉新章不同卽於光緒十四年十二月截止仍歸北洋防費舊案造報其自來年正月起照新章收支海軍經費另作起訖造冊按年報銷以期各歸各款免致牽混至工需雜費新章所定係屬約略大數將來如有變通增減之處應如何截長補短勻搭支用隨時察酌情形核實辦理飭據海防支應局司道具詳前來臣覆核無異理合恭摺具奏下該衙門知之○庚申 上詣

壽皇殿行禮○以援臺剿番功予故提督劉朝祐副將韓振基優卹○辛酉劉錦棠奏知縣馮森楷短發站費請革職議處從之○吳大澂奏臣於光緒十四年十月二十四日戌刻准直隸總督臣李鴻章轉電

總理各國事務衙門來電欽奉二十二日 諭旨垂詢鄭工現辦情形於是日亥刻敬陳大略電覆奏明在案至挑壩所以停止之故不能不據實 上聞西壩議築新挑壩一道在五十一占埽前生根自九月

二十二日興工至十月初三四日始得盤壓到底費料幾及一百垛蓋因一十七八日連日大風全河奔注埽前愈淘愈深一占進至十二三日殊非意料所及正在趕進第二占河勢忽又生險全力匯注挑壩上首將舊壩四十六七占陡壘平水初六日辰刻情形甚屬危險經前山東按察使潘駿文督率文武掌壩激勵委員搶鑲穩固適當稽料不足之時舊壩新占同時喫緊需料過多頗形掣肘臣與潘駿文通盤

籌畫若必俟挑壩築成再圖正壩核計時日過於遲緩料物亦難接濟與其兼營挑壩有誤金門堵合之期不如節省料稽專供兩壩進占之用凡事有經有權常則守經變則通權亦因時制宜之辦法而局中局外議論紛紜皆謂挑壩不應停做責備甚嚴且係臣自行奏辦之工忽又中止未免自相矛盾然臣再四思維洞護前說必致貽誤大工曠日廢料事無把握常人知經而不知權臣則當統籌全局權其輕重堅持定見不能不力排衆議捨挑壩而專力金門函商撫臣倪文蔚意見相同遂卽定議西壩於十三日開工先進一占東壩於二十四日開工續進一占惟口門愈收愈窄工作愈進愈難除新進兩占不計外現在實量東西正壩中間金門尙存三十二丈以後撐擋不敢過寬約須分作七占東壩進三占西壩進四占後晝夜不能停手便當一氣呵成趕至合龍而止臣亦不敢過於催逼致蹈草率之虞但令穩進穩壓料足土勻得一占保住一埽自無意外之虞計距小寒節不及四十日爲期頗形局促幸河勢尙屬平順溜力漸微趁此冰凌未結之時卽應竭力趕辦以期仰慰 聖懷廑念河工之至意至籌購料埽甚爲費力始於東西兩壩另設一廠旋又派員於北岸之王屋趙莊平皋灘添設三廠因西壩收料擁擠續添分廠一所總計八廠截至十月二十五日止共收稽料二百二十四埽體察民情亦不謂不踴躍臣大澈親赴各廠稽查勤惰諭令委員寬定價值隨到隨收隨時發價不令鄉民守候賠累亦不准料戶囤積居

奇撫臣倪文蔚亦屢札近工各州縣親自赴鄉勸諭民戶趕速運料赴工售賣並派員分路查催至再三不遺餘力無如各工緊要需料過繁日計有餘總計不足除榮澤壩堤護險工銷用三百垛及東西兩壩逐日動用外現存新料一千三百一十五垛舊有未用之料二百七十三垛統共存料一千五百八十八垛約計收至十一月底尙可續收二千餘垛足敷兩壩運占不致短缺遇大風雨雪料車不能源源而至此又未可逆料者兩壩開工以後其勢不能停工待料臣所以力爲籌購日夜焦思惴惴焉惟恐辜負聖恩爲懼臣惟有寬籌稽料不誤工需庶可克期竣事藉紓朝廷宵旰之勞報聞○壬戌轉熙敬爲戶部左侍郎調敬信爲戶部右侍郎轉續昌爲禮部左侍郎以文興爲禮部右侍郎○以丁汝昌爲北洋海軍提督林泰曾爲北洋海軍左翼總兵劉步蟾爲北洋海軍右翼總兵○命載澍詣壽皇殿恭代行禮○頒給清江城隍廟匾額○調烏拉布爲正白旗滿洲副都統清安爲鑲紅旗滿洲副都統以柏英爲正白旗漢軍副都統○調恩全爲左翼前鋒統領以慎銘爲右翼前鋒統領調謙光爲鑲黃旗護軍統領以恩普爲鑲藍旗護軍統領○調符珍爲鑲黃旗滿洲副都統桂全爲正紅旗滿洲副都統以克勤爲鑲黃旗漢軍副都統○張曜奏審擬搶奪觸礁輪船抗官斃勇案下刑部議奏○張曜奏黃河下游搶險員弁請獎下部議奏○予變飾助賑已故副尉達興阿之妻吉陽瓜爾佳氏旌表○諭本年各直省辦理

秋審人犯經刑部由緩決改情實者湖南山東均多至六起該撫並臬司於秋讞重犯未能詳審核議著交部查明分別議處嗣後各將軍府尹督撫等務當督同所屬遵照定例酌核案情悉心究擬固不可失之刻覈亦不可惑於救生不救死之說故從輕減總期設法持平無枉無縱用副明慎用刑至意將此通諭知之○癸亥倪文蔚奏鄭工捐輸請獎下戶部議奏○甲子吳大澂奏搶辦榮澤險工一律平穩下部知之○允吳大澂請各工用欸展限造銷○丙寅冬至大祀 天於 圖丘○劉秉璋奏西藏番官俸級請由川省折價發給以歸簡易下戶部議奏○劉秉璋奏川省被災籌欸撫卹下戶部知之○丁卯以羅榮光爲直隸天津鎮總兵○戊辰劉銘傳奏威定輪船失事都司李培林救護出力請獎允之○予因公淹斃浙江候補巡檢吳守植等優卹○庚午予景壽病假一月○辛未劉榮光奏審擬東陽縣糾眾劫獄案下刑部速議具奏○張之洞奏前准部咨各省捐修城工應於議修議築之始先行奏明存案該處有無軍務在於摺內詳細聲明等因通行遵照在案現據廣東布政使高崇基詳稱據香山縣紳士在籍候選道劉永康呈稱世居縣屬之前山寨地濱海澄近接澳門城垣年久失修坍塌過半城內舊址狹隘居民生齒日繁駐足無地自應及時修拓以資棲止而固苞桑該紳自願捐資集事不敢請給官欸當經檄飭署廣州府海防同知蕭丙堃會同委員候選通判張士彥勘得前山寨城北依山麓西南面海東爲直

走澳門之大路該城舊址長三百二十丈高及八尺或五六尺不等現據將東西南三面一律卸舊換新加展至三百三十七丈城脚用石城身用灰沙三合土築高一丈一尺城堞用磚高三尺五寸仍設東西南三門樓礮臺悉如舊址其北城舊基長一百六十五丈毋庸加展擬將城身築高一丈城堞亦三尺五寸通計周圍共長五百零二丈較之舊址加展一百四十二丈城牆皆七尺外城東南角開濠一道長一百五十丈兩面砌壩共闊二丈六尺至於城身加展所用糧田稅地多係劉姓公產計城牆壓占田地一十一畝二分開濠用田六畝五分東西南三面拓城共用田地三十七畝內有別姓三畝九分由劉永康等給價買回一併捐作城基應完糧稅照舊輸納所有圈入地場仍歸原主管業分別勘丈明確核實估計共需經費銀四萬餘兩劉永康自願獨力擔承成此盛舉並不請官發款亦毋須別處籌捐據該同知等勘明圈築之處並無阻礙橋梁道路民情亦甚樂從並據劉永康等呈請開工等情稟覆到司由該司具詳請奏前來臣伏查前山寨城建自前明天啟年間當水陸扼要之衝爲形勢所爭之地內達香山縣城外接澳門十里而近在今且尤爲衝要現因該城舊址窄狹民間栖止不敷邑紳劉永康等自願出資修理加展城身一百四十餘丈所需經費及應用田地悉係該紳捐給不動官款洵屬急公好義自應准其開工修拓以順輿情惟粵省現無軍務該紳捐修前山寨城係爲保衛居民鞏固海疆起見自當遵照